

## Was merr su babbeld

Honnes? Hon-nes? Hoon-ness?  
Wa-as ii-ss?  
Hon-nes?  
Ei was iss, warum kreischsden su?  
Weil du nix heerst.  
Isch heer disch doch.  
Awwer du heersds nitt klingele.  
Wo bisde donn?  
Himmel noch emol, im Keller.  
Unn was iss?  
Es klingelt doch schunn die gons Zeit.  
Es klingelt? Ich heer nix.  
Jetz hotts uffgeheerd.  
Dess heer isch aach nitt.  
Was heersde nitt?  
Dasses uffgeheerd hott.  
Ei doo gieh doch emol onn die Dier.  
Ja. Isch gieh jetz onn die Dier.  
Unn isch kumm die Trebb enuff. Unn?  
Doo iss kooner onn de Dier.  
Doo war awwer wer.  
Woher waaßden dess?  
Ei weils e paar Mol geklingelt hott.  
Isch habb nix geheerd.  
Dess war ooner von de Post.  
Woher waaßden dess jetz?  
Ewe iss dess geele Audo fortgefahrn.  
Der kimmt moie widder.  
Hosde ebbes bestellt?  
Naa, villeicht wars ferr de Nochber.  
Dess konn soi, awwer dess iss schlamm.  
Was iss schlamm?  
Dassdes Klingele nitt geheerd host.  
Isch war omm Kombjuder, der iss su laut.  
Dess hott nix mettem Kombjuder ze due.  
Naa? Ei mett was donn?  
Du heersd nimmi gut, dess isses.  
Ich habb disch doch rufe heern.  
Ja, dess hosde. Awwers Klingele ...  
... dess habb isch nitt geheerd.  
Honnes?  
Was iss?  
Du brauchsd e Heergerät.

Isch e Heergerät? Im Lewe nitt.  
Naa? Dann losses.  
Was issen jetz, was spitzden die Ohrn?  
Isch heer ebbes. Gieh mol mett uff die Terrass.  
Unn was iss jetz uff de Terrass?  
Scheene Blumme hawwe merr, gell?  
Ja. Was die Geranie noch su schee sinn.  
Werklich schee.  
Was gucksden alls in die Luft?  
Ei weesche dem Himmel.  
Enn scheene Himmel.  
Unn sunnst nix?  
Naa.  
Siehsde!  
Was siehsde?  
Du heersd nimmi gut.  
Ei warum donn jetz hier uff de Terrass?  
Weil ewe Kraniche gerufe hawwe.  
Kraniche? Kraniche? Ei wo donn?  
Grad iwwer uns.  
Kraniche? Die hätt isch doch geheerd.  
Naa, Honnes, die hosde nitt geheerd.  
Dess iss schlimm.  
Ja, dess iss schlimm.  
Dann deet isch doch ...  
... ei was donn?  
Moie zum Dokter gieh.  
Unn weesche was?  
Ei weeschem Heergerät.  
Uff oomol? Unn warum?  
Weil isch die Kraniche heern will.  
Die heersde dissjohr nimmi.  
Unn warum?  
Bisde doi Heergerät host isses Weihnachte.  
Doo fliehn die Kraniche nimmi.  
Unn doo heersdese nimmi. Isch habb derr ...  
Was?  
Die gons Zeit gesaat, gieh bein Dokter.  
Dess hosde gesaat?  
Ei ja.  
Dess habb isch halt aach nitt geheerd.